

Il conflict dal Giura n'è betg reglà

Dick Marty: «Vuschar puspè subit»

DA GUIU SOBIELA-CAANITZ

■ **Il 5 da november ha la prefecta dal Giura bernais annullà la votaziun communal ch'ins aveva arranschà a Moutier cun l'agid da la confederaziun il 18 da fanadur 2017, e quai pervi da «propaganda betg acceptabla» (La Quotidiana dals 6 da november, p. 16).**

Ina maioritad da votantas e votants aveva giavischà in transfer da la citad al chantun Giura. L'annullaziun na vala anc betg perquai che parts pertutgadas pon recurrer en chausa. Dentant constatti ch'ins vegn anc a spetgar per onns en noss stadi da dretg per reglar l'appartegnientscha chantunala da lezza citad (7477 olmas il 2017). Quai han ins gia fatg avant

decennis per il district da Laufen, oz part da Basilea-Champagna, e per la vischnanca da Vellerat, oz en il chantun Giura, davent da 2019 part da la vischnanca da Courrendlin. Il chantun Berna ha tuttina mussà dacurt sia prontadad da renunziar ad in'atgna vischnanca per in chantun limitrof. Els 23 da settember 2018 han quellas da Clavaleyres/BE e Murten/FR approvà lur fusiun, e quai cun 82,4% e 92,4% da las vuschs. Ins prevesa ch'ils suverans dals chantuns Berna e Friburg approvian il concordat e la fusiun en chausa il 9 da favrer 2020. L'onn 2022 duess Clavaleyres (var 50 olmas) vegnir part da la citad da Murten.

Uschè svelto na vai segir betg per la pitschna citad da Moutier. Là na san ins

anc betg co ch'i va vinavant. Segirà n'è gnanc il futur da l'ospital, il patrun principal, damai ch'ins vul al vender. Il renumà giurist internaziunal Dick Marty (*1945), anteriur procuratur e cuss. gov. tessinois, commentescha: «La decisiun da la prefecta vegn fitg tard, deschet mais s'enter la votaziun (...). Ussa vegnan puspè insaquants onns da ferma tensiun (...). La prefecta di che la tenuta da l'executiva da Moutier tanschia gia per giustifigar l'annullaziun da la votaziun. Ella avess però pudì dir quai spert, senza ina lunga perscrutaziun. Ins n'enclegia politicain betg che sia decisiun è vegnida uschè tard (...). Jau sun segir che la prefecta haja agì tenor meglier savair e pudair, dentant sco represchentanta admi-

nistrativa da la regenza bernaisa (...). Ussa va la chausa en giusta, pia tar la Dretgira chantunala bernaisa ed il Tribunal federal. Darar han ins surveglià ina votaziun uschè detagliadain en l'istorgia da la Svizra moderna [sco quella davart Moutier] (...). Il meglier dal puntg da vista politic fiss da votar puspè subit (...). Dapi ventg onns è la maioritad politica ed ils presidents communal da Moutier autonomists» (Le Temps, 6 da november). «Le Courier» (Genevra) dal medem di commentescha: «In uman uschè rar (un oiseau rare) sco Dick Marty pudess esser l'unica persunalitad abla da chattar ina conclusiun favuraivla per lez affar senza fin» (p. 6). Quai pudess ins duvrar.